

Antone e Bastian, i Sènc che vegn col freit

Tel meis de jené vegn festejà chisc doi sènc, che stèsc te l'orden sora i pajes de Dëlba e Penia, e Sèn Bastian l'è ence patron de Smeda

Fe e tradiziòns - Sa la val de sora i Sènc Antone e Bastian l'è i Sènc che vegn col freit, insèma a la Madona de Lourdes fora Ciampestrin ai 11 de firé.

No demò i vegn col freit, ch'est vel dir che l'èssa da esser freit e fredon, n freit sut, ma ence i ne aur l Carnascèr. Belapontin Sènt Antone chiama Carnascèr e con chisc Sènc la é ence fenida col se augurèr Bon An!

Sènt Antone, ai 17 de jené, patron de la geja de Dëlba

La jent zacan èa trop debeseegn de Sènc che stèsc sora i bistiam e la malaties, ma soraldut Sènt Antone l'è n Sènt misterious e con gran antiveder, ajache pèr che l posse intener canche doi persones stèsc ben insèma o adertura pa l les conjobiea. Per ch'est, ma fàzile ence pervia che l'era Carnascèr e ta Dëlba vegnia metù a jir n gran bal, Sènt Antone l'era soraldut i Sènt di jogn. Aboncont l vegnia preà ence contra i mèi che pòdea intravegnir a la fèmenes o al bistiam e vèlch outa se tachèa ence na fegura de ch'est Sènt dedant porta de stala. L stajea, nosc bon Sènt Antone, ence sora i fech e ajache l varia i malé, l vèrda via belimpont dai feghes de Sènt Antone, na sort de herpes, che i ge disc amò cuscita inchecondi.

Con mià gran marevea é troà n Sènt tacà sun porta de stala ence chiò te majon de chi Foles sa Cianacei, chiò a cèsa mia, amò n Sènt tacà su da mi veges e ch'est me à fat n gran chet.

Te geja de Dëlba la touses jia pa a veder se la statua del Sènt ge èssa cignà per intener se les èssa ciapà da se maridèr amò in chel an. Jia ben ence vèlch desperèda che era restèda da maridèr fin de na età, che n'outa sessaben l'era vèlch da se tegnir de mèl. L maridòz per na fèmena l'era soraldut na arsegurazion sozietà e ence la sozietà spenja acioche ic e eles se maridasse per aer jent, per formèr de neva families. Inchecondi l mond va pa ben a la reversa, dijessa na persona de età, e donca se sin vèrda da se maridèr. Aboncont amò per sgherz vèlch tousa va a sègra col guant e fosc la prea i Sènt che l la deide coi padiments de sie cher.



Rapresentanc de Schlützen, Grop de Folclor e Musega AutaFascia con Don Mario dò la messa de sègra ta Penia.

Chi èrel Sènt Antone?

Se jà se ge fèsc festa e magari se se tol fora dotrei oes per jir a sègra col guant, l'è scialdi bel saer chi che l'era ch'est Sènt. L se moscia con na bërba



La geja de Penia con la statua de Sèn Bastian dedant utèr.

biencia, n bachet e o na crouse, vèlch outa n porcel, n liber o ence n malan. Nos aon informaziòns de Sènt Antone tras n sie scolé, l pisciof de Alessandria de Egit. L Sènt l'è restà te la istoria per sie combatiments contra i demonie e sia tentaziòns.

Antone l'era nasciù te l'Egit intorn al 251 dò da Crist, fi de riches bachegn, l'era restà orfen de 20 egn e l'aea cognù se cruzièr de amministrèr sie bens e vardèr via na sor più picola. Aldò de chel che disc l Vangele: "Se te ves esser perfet, va, veni chel che t'è e dagel ai peres", l spartesc sie bens anter i peres che l cognosc, l desc sù sia sor a na comunanza de fèmenes e l se tramuda tel desert. Te na crepa l troa alberch e majon e aló l vif sia vita prean, combatan la tentaziòns del demonie, disc la contia e fajan miràcui. Aldidanché nosc degan e curat, Don Mario, é badà che te sia perdices, l di de Sègra, l conta del Sènt recordà in chela medema di.

Sèn Bastian

Instadì, la di de Sèn Bastian, ai 20

de jené, pruma sègra ta Penia, ch'est an l'era bon freit, ma no pa freit desche i prumes egn che jie a sègra, che me recorde se batea i dents col guant da zacan a 20 degrè sot zero.

Sèn Bastian ence l'è n Sènt che



N chèder de Sènt Antone te majon de chi Foles a Cianacei.

porta freit e l stèsc sora la besties e Don Mario, indèna la messa te la bela picola geja de Penia, l'è contà la istoria de Sèn Bastian e ence pa percheche se l vèit scialdi col corp trapassà da la frizes, martorià desche tenc, percheche l ge tegnia a sie fé cristiana.

Sa Penia freit o ciatù che sie, dant de ciapèr la pontaa per jir sun geja se ciapa n bon vin chet bianch o ros o n té ciatù e grostui da pèrt del Grop de la Mèscres de Penia e jà se sent aria de mèscres che va a chiamèr, che in chela sera l'è la pruma mascherèda! Per la pruma outa in vita mia me è lasciat l camejot a cèsa. Se tel jir in ite da Cianacei, a pe dò l bosch, tachèa a min aer recor, canche é fat la scòles de la geja de Penia me é imprometù che mai più zenza guant! Te mie recor i Sènc dal freit i chiamèa pa n muge de jent regolèda da festa. Instouta da Sèn Bastian l'era bandieres belebon, ma fascènes e fascègn ben pec, desche con dir che ence ch'est Sènt l'è inchecondi manco sentù, na festa manco solene che zenza.

Bon che l'è scialdi l Grop da la Mèscres de Penia che tegn sù la usitèdes e ence l paisc vegn regolà sù a festa con gran mèscres dessegnèdes sul papièr e tachèdes fora sui tobié. Domesdi via, desche da tradizion, l'è stat la cercia di gròstui, olache se pòdea litèr i miòres. I miòres gròstui l'è stat chi de Bepe Eccel, pèr de Nicola e Andrea de Orselina da Penia, e l secondo post, desche tropes egn, l'è stat indò vent da Teresa de Vito, per se intener Teresa de la Lis dal Vera che la i fèsc, se me recorde ben, bie sotii, ma l giust, che no i se crepe cò se i ciapa te man: l terzo post ch'est an l'è jìt a Fernanda de Milio de Tone da Dëlba. Sun piaz l'era ence la peisa de l'ardel che ch'est an l pesia stolc 11 chilli e 20. Chel che ge é jìt più davejin l'è stat fom de Francesca, fia de Fanci e Giuliana da Pian da Molin.

In ch'est an dapodò ge vel recordèr che l Grop de la Mèscres da Penia l compesc 50 egn. Al scomenz de la mascherèda te la scòles de Penia l Grop ge à donà a sie president Ezio Verra n bel chèder in recordanza per dut chel che l'è fat e in speranza per dutcant chel che amò l volarà meter a jir.

ClaudiaConte